

MUKANDA WAKAFUNDELA PAULO ASI

KOLOSAI*Ambâtumela Moyo*

1 Paulu, utumami a Kristu Jesu uma lu lulangu la Unyashungu, la Timote unyasu,

2 Le ekilami la anyasu wa kolamelu le Kristu weli la Kolosai:

Ngandji ka mamba kayali la nyu, ndu ki k'uma le Unyashungu Shesu!

*Mbetawo la Ngandji ka Mamba
k'Asi Kolosai*

3 Shu tatukaka Unyashungu, Shi Khumesu Jesu Kristu, lusaka, tatunyolombelaka nshi tshe. 4 Shu takuki lukumu la mbetawo kanyu le Kristu Jesu, ndu dia ngandji kukanyu ekilami tshe, 5 ne dia elungamelu kambuwunyukitshiya l'ulungu, kakanyuki lukumu lato ntundu lu diui dia mete dia lukumu l'ololo, 6 lakayi le nyu. Lo leko ndu lu kete tshe — latotokaka elua, latufulaka — uku atshalo ndu l'etema anyu uma lu lushi lakanyuki ndu lakanyeyi ngandji ka mamba ka Unyashungu lu mete; 7 uku akanyeki uma le Epafara, unyasu ukambi wa ngandji, leli ukambi a Kristu a kolamelu dia dikambu diasu, 8 ndu lakatutela dia ngandji kanyu le Nyuma.

Paulu Ambutetemala Mbâlobela

9 Dia dikambu ne, ndu shu, uma lu unya wakatuki lukumu lone, hatuheko nyolombela lu dombelo diasu, dia nyu ndudiana lu nimbite la lulangu landi, dia nyu ndjala la yimba ya nshihudia akambu tshe wa Nyuma, 10 dia nyu nkendakenda ololo uku alanga Khumadiondjo, dia nyu nto elua lu elimu w'ololo tshe, la dia mbula lu nimbite la Unyashungu. 11 Nyukikitshami la wulu tshe, uku wulu a lutumbu landi, dia nyu ndjala la etetemalu lu memakana, kame la ongenogeno. 12 Nyuki Shesu, one lakatete ololo dia shu nkita ukito w'ekilami wa yanyi, lusaka. 13 Ndi kakatutshungula uma lu wulu a udjima, kakatukadimula utsha lu diulelu dia On'andi la ngandji. 14 Uma le ndi kesu l'etshungwelu kasu, ndu la edimanyelu ka kolo yasu.

Ona Keli Ladiku Dia Akambu Tshe

15 Ndi eli efanelu ka Unyashungu kahenama, enundu a diango tshe diakatungama. 16 Ne dia le ndi, kakatungama diango tshe, l'ulungu ndu la kete, diango dienama ndu diango diahenama, kana kiti ya diulelu, kana ewandji, kana waulelu, kana embuledi. Ndam kakayatungela diango tshe. 17 Ndi keli ladiku dia diango tshe, diango tshe diambukutshama le ndi. 18 Ote a dimba mbendi, dieli Ekelezia. Ndi keli etatelu, keli enundu a wane wulo uma lu nyoi, dia ndi ndjala ladiku di'akambu tshe. 19 Ne dia Shesu akalangi dia elulelu k'akambu tshe ndjala le ndi, 20 la dia ndi mbekesanyia diango tshe la ndi, mbakandete ki lu dikila dia l'utamba andi a mpeketanya, l'atei a diango dia la kete ndu diango dia l'ulungu.

21 Nyu wane wakangana, ndu waki atunyi lu tukanyi tanyu ndu l'etsha anyu wa kolo, 22 keli kakiane ndi ambunyekeanyia la dimba diandi ne dia nyoi kandi, dia nyenya lu ashu andi uku ekilami waha la ekomo, waha la unungu, 23 naka nyu nyayutetemala lu mbetawo, naka nyayuyashikike, naka hanyunganyia uma l'elungamelu ka lukumu l'ololo lakanyuki, lakasambishama l'etungelu tshe la tshina di'ulungu, ndu lakamayala, dimi Paulu, usambisha alo.

Paulu Ambuyanga Nduwanya Ekelezia

24 Kakiane, dimi lambongenangena lu asui ami wamumusua dikambu diany. Dimi lambukutsha asui wa Kristu wutshikadi lu dimba diami, ne dia dimba diandi dieko Ekelezia, 25 ako wakamayala usambisha uku ulimu wakambisha Unyashungu dia dikambu diany, dia nyushihudia diui dia Unyashungu. 26 Dio mbeli dikambu dia usheshe diakashama enonyi l'enonyi, ndu nonga la nonga. Keli kakiane, dio diambenama le ekilami andi, 27 le wane wakalangi Unyashungu mbewuya dia ongoni la lutumbu la dikambu ne diushami l'atei w'asi wedja, dieli Kristu l'etema anyu,

elungamelu ka lutumbu. 28 Ndi kanyutelasu, tatewulaka untu tshe, ndu tatetshaka untu tshe la yimba tshe, ne dia shu nduwula untu tshe l'uluwanyi le Kristu. 29 Dia dikambu ne, mbatumutshaka ulimu wulu, mbatumuhimbaka ntsha ulimu andi la wulu ami tshe watundumbishaka.

Washikicali lu Mbetawo

2 Ne dia dimi nangaka nyu mbeya okone anyukambelami, ndu wa la Laodikiya, ndu untu akina wahatamenyi la ashu, 2 ne dia etema awo wakikitshami, la wakimameli lu ngandji la lu ongoni w'akambu tshe wa yimba, ne dia vo mbeya dikambu diushami dia Unshungu, dieli Kristu; 3 ongoni a yimba la bewu wambushama le ndi. 4 Dimi lambunyutela dikambu ne, untu tanyunganyiaki la aui w'amena. 5 Kuyanga dimi kema l'atei anyu, ku utema ami eko le nyu. Dimi la ongenongeno lam'enami ndjalongosola kanyu, ndu ushikicali lu mbetawo kanyu le Kristu.

6 Uku akanyalungula Khumadiondjo Kristu Jesu, okone nyokendakendaki la ndi. 7 Nyuyakikitsha, nyuyaudia, nyuyashikike lu mbetawo kanyu le ndi, pupu uku akatanyetsha. Nyukaki Lusaka efula.

Paulu Ambuwaewula Dia Vo Tawunganelaki

8 Nyewo, untu tanyunganyiaki la yimba y'antu ndu la akambu wa kashi, uku ditshelu di'antu, watuyelaka akambu wa la kete, wahayeli Kristu. 9 Ne dia elulelu tshe ka Unyashungu keko lu dimba diandi, 10 ku nyu nyambukuma lu elulelu ka lumu le ndi, nd'ako leli ote a diulelu tshe la wulu. 11 Le ndi kakanyahema ehekali waha l'anya lam'akanyanya utema a ntundu, lu diahamelu di'uhekali wa Kristu. 12 Nyu nyakakhundama la ndi lu batiza, ndu nyakulwama la ndi ne dia mbetawo ka wulu a Unyashungu, lakawulula uma lu nyo. 13 Nyu wane wakavu ne dia kolo yanyu, ndu waki kumbahema ehekali w'alimba, Unyashungu akanyusha lumu kame la ndi, akatudimanyia kolo yasu tshe. 14 Ndi akadimula mukanda w'adjangu wakawatufundela, akawunya uma l'atei asu, akokokome l'utamba a mpeketanya. 15 Okone ndi akanya waulelu la embuledi, akawaenyanya lu seke, akaleki wulu l'utamba a mpeketanya.

16 Okone untu tanyulumbuyaki ne dia mbu ya nde, kana diango dia no, kana dia lushi l'ongenongeno, kana alelu ka ngondo,

kana lushi l'ekila. 17 Akambu aso weko uku didjidji di'akambu wayayi, keli dimba dieko dia Kristu. 18 Tanyetawoki untu nyohotola ushasha anyu, ne dia ndi ambuyakitshakitsha anyanya, la atotemolaka andjelo, atukanaka yimba dia waenelo andi, atutakulaka ne dia tukanyi tandi ta akambu wa dimba. 19 Ndi hamamema Kristu leli Ote a dimba; diango tshe dia dimba diambusangana ndu diambula uku akadilangi Unyashungu le ndi.

20 Naka nyu nyakavu kame la Kristu dia akambu wa la kete, okoko wana watshanyu uku atutshaka wa la kete? Dikambu kuna dietawonyu adjangu nyati: 21 Tukimelaki! Toletaki! Tunandaki! 22 (dikambu so ndjalaka dia diango tshe diatulamaka lam'ambudiotshama ulimu), uku wata elembe la wetshelu w'antu? 23 Mete, akambu aso weko la yimba lu ashu w'antu wayasonwela diango diatemolawo, wayakitshakitsha, ndu wasuya alimba. Akambu aso hawushimbi akambu wa kolo w'alimba.

Lumu l'Uyuyu le Kristu

3 Naka nyu nyakulwama kame la Kristu, nyuyangi diango dieli l'ulungu, lu dihuli diudjashi Kristu, lu lunya la pami la Unyashungu. 2 Nyukani yimba ya diango dia l'ulungu, aha dia la kete. 3 Ne dia nyu nyakavu, ku lumu lanyu lambushama la Kristu le Unyashungu. 4 Lam'ayenama Kristu lumu lasu, ku nyu nyayenama kame la ndi lu lutumbu.

"Nyambukulula Untu Edjedja, Nyambolota Untu Uyuyu"

5 Okone nyudiaki akambu wa kolo wa la kete: munanyi, akambu wa mindu, saki ka dimba, lulangu la kolo, okomiya, weli otemwelo wa dikishi. 6 Dia akambu ane, kele ka Unyashungu atuyakaka le akanga w'uhedia. 7 Ndu nyu nyakakendakenda loko ntundu lam'akanyakendakenda lu akambu ako. 8 Keli kakiane, nyunya akambu ane tshe: kele, lutunu, somboki, lotengo, aui wa sonyi uma l'enyoy anyu. 9 Tanyutaki kashi, ne dia nyu nyambukulula untu edjedja la akambu andi, 10 nyambolota untu uyuyu, lufanyi la utungi andi lu yewu y'uyuyu. 11 Loko, aha usi Ngirika kuyanga usi Juda, kuyanga umbahemi w'uhekali, kuyanga aha umbahemi w'uhekali kuyanga osendji, kuyanga usi Skutiya, kuyanga fumbi, kuyanga luyadjasedi, keli Kristu ambukuka tshe, eko lu akambu tshe.

12 Ne dia nyu nyeko esonami wa

Unyashungu, la ekilami wa ngandji, osoku nyolote etema wa ketshi, la wa memakana, la wa ndjakitshakitsa, la wa kenemo, la wa kolamelu. 13 Nyukikaneli kolo. Nyudimanyanya kolo yanyu, naka untu eko la ukina dikambu. Uku akanyudimanyanya Khumadiondjo kolo, dieli la nyu, ndu nyu dia nyimanyiana kolo. 14 Ladiku dia akambu ane tshe, nyolote ngandji; to keli dimama dia uluwanyi. 15 Ki ka Kristu kuleli l'etema anyu, dia dikambu ne mbakanyetama lu dimba otoi. Nyukaki lusaka. 16 Diui dia Kristu diadjase, diangone l'etema anyu. Nyetshanya lu yimba tshe, yewani la kimbu la esambu w'ololo la wa Nyuma. Nyimbeli Unyashungu esambu la ngandji ka mamba l'etema anyu. 17 Akambu tshe watanyu la watshanyu, nyutshi tshe lu lukumbu la Khumadiondjo Jesu. Nyuki Unyashungu Shesu lusaka dia dikambu diandi.

***Elimu wa Lumu l'Uyuyu:
le Wadi la Waumewo,
le Ana la Ambutshi Awo,
Ndu le Ehombo la Akhumewo***

18 Wadi, nyuyali l'okongo a waumenyu, uku alanga Khumadiondjo. 19 Waumi, nyulangi wadienyu, tanyahetshaki. 20 Ana, nyukitanyiaambutshi anyu lu akambu tshe; dikambu so mbatongenyangenyaka Khumadiondjo. 21 Nyu washi, tanyutshaki an'anyu kele, ne dia vo watukuheko. 22 Ehombo, nyukitanyia aui w'akhumenyu wa la kete, aha paka lu ashu awo, uku wane walanga ngenyangenya antu, keli nyutshi ulimu l'utema otoi, uku antu wuka Khumadiondjo woma. 23 Akambu tshe watshanyu, nyatshi l'utema otoi, uku le Unyashungu, aha le antu. 24 Nyeyi nyati: Nyu nyayulungula difutu dia sangu uma le Khumadiondjo. Nyu nyutakumbelaka Khumadiondjo Kristu ulimu. 25 Ne dia one latutshaka kolo, ayulungula uku kolo kakandatshi, dikambu so hayala shonodi.

4 Akhumi, nyutsheli fumbi yanyu akambuu w'ololo. Nyu mbeyaka nyati: Ndu nyu nyeko la Uwandji l'ulungu.

***Alaku Amotshi: "Nyutetemali Nomba;
Nyokendekende la Yewu"***

2 Nyutetemali nomba, nyosenaki la

eukelu ka lusaka. 3 Nyutolombelaki ndu shu, dia Unyashungu ntudihwela lukuki, ne dia diui dia mvuta dikambu diushami dia Kristu, dia dikambu ne mbemi lu lukanu, 4 dia dimi mpunula dikambu diako uku ahumbami mvuta.

5 Nyokendekende la yewu le antu wahatetawo, tanyushishaki etena. 6 Nyutaki paka aui wa ngandji ka mamba tena tshe, wosohanyimi la leho dia nyu mbeya wuhu wa nkaluya untu tshe diui.

Ambutuma Tukiko la Onesimo

7 Tukiko, unyasu la ngandji la ukambi a kolamelu ndu unyasu ukambi le Khumadiondjo, ayunyutela akambu tshe. 8 Dia dikambu ne, mbakamutumi le nyu, dia nyu mbeya okone wesu, la dia ndi nkikitsha etema anyu. 9 Ndu Onesimo, unyasu la ngandji la kolamelu, usikanyu kendi. Vo wayunyewuya akambu tshe weli lindu.

Moyo Uma le Anyasu

10 Aristarako, unyami usi lukanu, ambunyutumela moyo, ndu Mako, onangu Baranaba (lakanyutela dikambu diandi — naka ndi ambuya le nyu, kanyulunguli), 11 la Jesu, latuwetaka vati: Justo. Vo atu mbeli antu wakahema uhekali l'atei wa anyami ekambi w'ulimu wa diulelu dia Unyashungu. Vombakankikitsha. 12 Epafara, usikanyu, ukambi a Kristu, ambunyutumela moyo. Ndi atunyolombelaka, dia nyu nduwana la ndjala la elungamelu ka wulu lu lulangu tshe la Unyashungu. 13 Ne dia omenyi a dikambu diandi mbemi, nti: Ndi akakambi ulimu efula dikambu dianyu ndu asi Laodikiya, ndu asi Hiyerapoli. 14 Luka, wetshi walangema, la Demasi, wambunyutumela moyo. 15 Nyusha anyasu wa la Laodikiya ndu Numafasi, ndu Ekeleza weli lu luudu landi, moyo. 16 Lam'ayunyala mukanda one l'atei anyu, nyuwaleli ndu Ekeleza w'asi Laodikiya. Kanyali ndu mukanda uma la Laodikiya. 17 Nyuteli Arakipo nyati: Ulamaki ulimu wakakusha Khumadiondjo, ūshidiya.

Diui Di'Etshokwelo

18 Dimi Paulu lambunyufundela moyo la lunya lami. Nyuho kanu yami. Ngandji ka mamba kayali la nyu!